



Ban duna Jenny un man



ORANJESTAD (AAN) - Jenny Kock ta e pintor Arubiano hopi conoci y cu ultimo tempo door di su handicap e mes tabata tin su medio di transporte cu tabata un brommer. Pero actualmente e brommer pa un of otro motibo no ta core mas y ta pesey ta pidi cooperacion di e pueblo pa asina yuda Jenny cu e por drecha su brommer. Jenny Lorenzo Kock a nace na Aruba na aña 1958 como yiu di un famia grandi. Na edad hopi hoben el a bira victima di un desgracia den cua el a ricibi sla na cabes y a keda cu un handicap motorico.

Di su cinco te cu su diesocho aña el a keda den Verriet Instituut na Corsow pa tratamiento medico y revalidacion. Despues di algun operacion el a siña cana atrobe y tambe papia Hulandes. Una bes el a bolbe Aruba e soeurnan di Santa Cruz tabata encarga cu su cuidu. Door di su handicap motorico hopi bes comunicacion oral tabata un problema y regularmente hendenan tabata comprend'e robes.

Esaki tabata pone Jenny sinti su mes ansha y cu miedo. E tabata anhela di tin contacto cu

e hendenan rond di dje, pero cada bes e tabata haya su mes dilanti di un muraya halto, cu tabata parce di ta tur rond di dje. E tabata sa cu na e otro banda di e muraya ey tabatin claridad, pero e tabata para den scur.

Tabata den e periodo ey cu el a trata di transforma su sentimentonan den pintura. Zuster Philoté y e trahado social Geeta Gabriëla a ripara esey. Nan a yude sobrepasa su berguensa y a dune e prome material di trabou necesario. Mas o menos na aña 1984 el a entrega trabou pa un exposicion di grupo na Sociedad Bolivariana. E pintor Nigel Matthew, cu prome cu esaki nunca no a yega di mira e trabou di Jenny Kock, mesora a keda impresionado pa e emocionnan impactante cu su obranan tabata expresa. Aunke nan tabata reda un man cu ta tembla, nan tabata sutil di tono y ambiente.

Mientrastanto Jenny a haya luga den Bon Bini Festival, cu tur siman tabata ser teni na Fort Zoutman. Su paisahenan a resulta di ta hopi pidi pa e turistanan cu tabata bishita e festival. Mas tanto tabata trata di obranan pinta cu krijt. Despues el a cuminsa experimenta cu 'waterverf' y 'olieverf'. Na 1990 pa prome bes Jenny a tene un exposicion den Galeria Arti Shock e so. Galeria Arti Shock e tempo ey ainda tabata situa den Wilhelmina Straat. E mesun aña ey el a participa tambe na un exposicion di grupo di pintornan Arubano den embahada Hulandes na Caracas, Venezuela.

Fundacion Premio oro a otorga un reconocimiento pa su desaroyo personal y su presentacion. Na 1991 el a sali pa Hulanda pa capasita su mes den



e arte di pintamento. Eynan, pa prome bes, nan a siñe expresa su mes abiertamente y kibra e bareranan rond di dje. El a sera conoci cu e arte den 'Rijks-', 'Stedelijk' y 'Van Gogh-museum' na Amsterdam. El a haya les na 'Kunst-academie' na Rotterdam. El a experiencia e otro diferencianan den color y e trahamento cu e lus for di diferente angulo di e parti nort di Europa. Jenny a descubri un libertad nobo y poco poco ela sinti con su sentimiento di ansha tabata bira menos.

Di otro banda e tabata sinti

falta di su famianan na Aruba y na cumisamento di aña 1994 el a bolbe su isla natal. Cu un rikesa di e experiencia nobo y specialmente tecnica nobo. Tecnica cu ta habri e posibilidad pe pa expresa tur tipo di topico na un forma simbolico y cu hopi emocion. Un ehempel di esaki ta su interpretacion di e storianan di bijbel, cu pa su publico e ta visualisa di un forma no figurativo. Jenny ta posee un memoria fotografico increibel; alabes e ta buscando ainda forma y posibilidadnan di expresion nobo. Jenny a descubri cu porfin poco poco ta birando menos dificil pe haya contacto cu hende. Pero pa haya mas comprension y reconocimiento den comunidad e tin un caminda largo pa cana. Cu e obranan den e exposicion aki Jenny ta demostra cu definitivamente el a sali for di scuridat y cu alegria den libertad e ta riba e caminda cu ta conduci pa claridad. Un caminda riba cua e ta topa amigo cu sa esaki y cu ta confirma p'e: "no, Jenny, bo no tin un enfermedad, djis un handicap".

Cu tempo el a logra haya hasta un brommer unda cu e por a move y bay aki aya, pero



awor e brommer no ta core mas y Jenny ta sintie un poco man mara ya cu e no por logra move ningun caminda. Pa logra recauda fondo pa e por logra drecha su brommer Jenny ta bendiendo su pinturanan. Pa por logra wak e pinturanan y cumpra nan por pasa na Kadushi Largo 13A y asina bo ta duna un man pa Jenny yega bek na su brommer. Pa mas informacion pa esnan cu kier yuda tambe por yama na tel 5852384 - Cel 5645967. Jenny lo keda hopi agradecido na tur esnan cu por dune un man.